

14.11.2017

UKA2017/38

Uunga siunnersuut: Aningaasarsianit akileraarutit pillugit Inatsisartut inatsisaata allanngortinneqarnera pillugu Inatsisartut inatsisaat nr. xx, xx. xxx 2017-imeersoq
(Aningaasaqarnermut Akileraartarnermullu Naalakkersuisoq)

Siumumiit nuannaarutigaarput aningaasaqarnermut naalakkersuisup erseqqaarissumik nassuiaalluni saqqummiussaa.

Tamanna Siumumiit malinnaaffigilluarparput, soorluttaaq aasaq aningaasanut inatsisissaq saqqummiunneqarmat ilanngullugu taakkartorneqartoq.

PFA Soraarnerup Danmarkimut nuunneratigut aningaasat ersertittissutaasussat pillugit immikkut qanoq iliuuseqarnissaq pisariaqarmat, Siumumiit paasilluarparput. Taamaalilluta nunatsinni aningaasaqarnikkut aningaasalersuutissanullu, soorlu mittarfiliortiternernut, iluaqutaasussaammata, Siumumiit tamakkiisumik tamakkununnga tamakkiisumik tunualuqutaanerput naqissusissuarput. Siunissamut aningaasaliinerummat.

Sulisoqarneq aaqqiviginissaa pisariaqartoq, Siumumiit paasilluarparput. Nunatsinni ullumikkut sulisusaqarniarnikkut killilerujussuarmik periarfissaqarpugut, taamaattumillu sanaartugassanut annertoorsuarnut sulisusaqarnikkut qulakkeerinninnissarput pisariaqarpoq, aamma avataaniit nunatsinnut suliarforsinnaasut iluaqutigalugit suliassat annertoorsuit naammassiniartariaqarpagut. Soorunami nunatsinni najugaqavissut sulisorineqartarnissaat atorluarnissaallu salliutittuassavarput, tamannalu pillugu aamma inatsisitigut qularnaarinninneq suliarineqartoq peqataaffigaarput. Akileraarutitigut aaqqiissutissat saqqummiunneqartoq tassa mittarfissuit sanaartornissaanni avataaniit suliarfortut nunamut tamarmut akileerartussanngortinnissaat Siumumiit isumaqatigaarput. Tassami nunatsinni ineriartornikkut ingerlaqqinnissatsinnut nunamut tamarmut iluaqutaasussamut tamatta kommuunik immikkoortitaqarata ikorfartuineqataanissarput pisariaqarmat, tamanna aamma siunissamut aningaasalersuinerummat, kommuunillu tamarmik aningaasaqarniarnernut iluaqutaasussaammata.

Allannguinerit angisuut ukiuni kingullerni amerlasuuni nalaattarpangut. Assersuutigilara Nuummi erngup nukinganik nukissiummik sanasoqalernera allannguinerimik aningaasartuutinillu annertuumik nassataaqarsimasoq, akerlilersorneqarsimaqisoq, ullumikkut nalunngilarput avataaniit ikummatissamik eqquusuinikinnerulernermik kinguneqarnerata, nunatsinnut qanoq aningaasatigut sipaarutaasimaqisoq, nunatta nammineerluni nukik pilersitaa taarsiullugu atorneqarluni. Ilanngullugu taarusuppara Ilimmarfik Nuummi sananeqalermat aammaarluni qanoq akerlerineqarsimatigisoq. Allannguneq taanna aamma aningaasarpasuarnik akeqarsimavoq. Kisianni ullumikkut takusinnaavarput nunaqavissut ilinniagartunngoortut aallartittullu qanoq amerleriarsimatigisut. Tamassuma uppernasarpaa nunatta qanoq iluaqutigigitigaa. Apeqqut una taamaasillunga tikippara: Ilaannikkut allannguinnissaq sapiiserfigisanngikkuttigu, taava qanoq

siuariartussuungut? Naalackersuisuutitaqartut isumaqatigiissutaanni qulequttaapput ; naligiinneq, toqqissisimaneq, ineriartorneq. Taakkualu tunaartaralugit Naalackersuisut sulinerat Siumumiit nuannaarutigigatsigu oqaatigissuarput. Ukiualunnguit qaangiuppata nunatta aningaasaqarnera ajorseriartussaavoq, tamanna pisussaaffiliivoq sukkasuumik sulinissamik, suleqatigiinnissamik, avataaneersunik kisianni aamma akornitsinni. Inuiaat maani ikittunnguuvugut, qimoqatigiitta ornitamut.

Taamatut oqaaseqarluta Siumumiit inatsisissatut siunnersuut taama isikkoqartillgu ilalerparput. Qujanaq.

Jens Erik Kirkegaard.